

四庫全書

子部

欽定四庫全書

子部  
冊府元龜卷三十一  
下

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣王鍾泰

謄錄監生臣張玠

欽定四庫全書

冊府元龜卷三十一

宋 王欽若等 撰

帝玉部

奉先第四

唐武宗以開成五年正月即位上元聖昭獻皇帝尊謚  
廟號文宗葬章陵

二月制穆宗妃韋氏追謚宣懿皇太后帝之母也

三月勅復國忌行香以文宗開成三年十月曾廢故也

會昌元年五月祔宣懿皇太后于太廟六日制曰朕近  
因載誕之日展承顏之慶皇太后謂朕曰天子之孝莫  
大於丕承人倫之義莫重於嗣續穆宗睿聖文惠孝皇  
帝厭代已久星霜屢遷禰宮曠合食之禮惟帝深濡露  
之感宣懿皇太后長慶之際德冠後宮夙表沙麓之祥  
實茂河洲之範先朝恩禮之厚中壺莫偕況誕我聖君  
續承昌運已協華於先帝方延祚於後昆思廣貽謀庶  
弘博愛爰遵舊典以慰孝思當以宣懿皇太后祔太廟

穆宗睿聖文惠孝皇帝之室率是彝訓其敬承之朕祇奉  
慈旨載深感咽宜令宣示中外咸使聞知

五年十月中書奏云汜水武牢關是太宗擒王世充竇  
建德之地關城東峯有二聖塑像在一堂之內伏以山  
河如舊城壘猶存威靈昔著于軒臺風雲還凝于豐沛  
誠宜百代嚴奉萬邦所瞻西漢故事祖宗嘗所行幸皆  
令郡國立廟今緣定覺寺例合毀拆望取寺中大殿材  
木於東峯改造一殿四面兼置宮監伏望號為昭武廟

以昭聖祖武功之盛望委孟懷節度使差幹事判官一人勾當修建然聖像頗已故暗望令李石于東都揀絕好畫手就加嚴飾初興功日望令東都差分司郎官一人薦告畢日別差官展敬從之

六年二月太常禮院奏准勅東都太廟諸室神主共二十六都待修廟畢日具禮迎致于西夾室所遷神主月日及儀注等宜令所司詳定聞奏者擇用四月九日告制可

宣宗以會昌六年三月即位上至道昭肅孝皇帝尊謚  
廟號武宗葬端陵

四月東都留守李石奉脩奏太廟畢所司迎奉太微宮  
神主祔廟訖東都太廟者本武太后家廟神龍中中宗  
反正廢武氏廟主立太祖已下神主祔之安祿山陷雒  
陽以廟為馬廐棄其神主而協律郎嚴郢收而藏之史  
思明再陷雒陽尋又散失賊平東京留守盧正已又募  
得之時廟已焚毀乃寄主於太微宮大歷十四年留守

路嗣恭奏重修太廟以迎神主詔百官叅議紛然不定  
禮儀使顏真卿堅請歸祔不從會昌五年留守李石因  
太微宮正殿圯多請以廢弘敬寺為太廟神主祔之又  
下百寮商量皆言准故事無兩都俱置宗廟之禮唯禮  
部侍郎陳商議云周之文武有鎬維二廟今兩都異廟  
可也然不宜置主于廟主宜依禮瘞于廟之北墉下事  
未行而帝即位因詔有司迎太微宮寓主祔廢寺之新  
廟而知禮者非之

懿宗以大中十三年八月即位上聖武獻文孝皇帝尊  
謚廟號宣宗葬真陵

九月追尊母晁氏為太后謚曰元昭

咸通元年十一月丁未有事于郊廟

十三年十二月制追謚宣宗為元聖至明成武獻文睿  
智章仁神聰懿道大孝皇帝

僖宗以咸通十四年七月即位上睿文昭聖恭惠孝皇  
帝廟號懿宗葬簡陵

乾符元年十一月庚寅有事于郊廟

中和元年四月帝在成都府有司請享太祖已下十一

室詔公卿議其儀太常卿崔厚議立行廟以玄宗幸蜀

時道宮玄元殿之前架帷幕為十一室又無神主題神

主版位

達禮者非之明年乃特造神主以祔行廟

光啟三年二月自興元還京以宮室未脩權駐鳳翔禮

院奏皇帝還宮先謁太廟今宗廟焚毀神主失墜請准

禮例修奉制曰朕以涼德祇膺寶圖不能上承天休下

正人紀兵革競興於寓縣車輿再越於藩垣宗廟震驚  
烝嘗廢缺敬承典禮倍切哀摧宜付所司時奉脩太廟  
使宰臣鄭延昌奏京城除充大內及正衙外別無殿宇  
伏聞先有詔旨欲以少府監大廳權充太廟從之

昭宗以文德元年三月即位上惠聖恭定孝皇帝尊謚  
廟號僖宗葬定陵

四月庚午追謚聖母惠安太后王氏曰恭獻

十一月甲寅有事於郊廟

哀帝以天祐元年八月即位上聖穆景文孝皇帝尊謚  
廟號昭宗葬和陵

二年二月己未昭宗皇帝神主祔太廟禮院奏昭宗廟  
樂曰咸寧之舞時左僕射裴贄等議遷廟合遷順宗一  
室從之

四月勅河南府緱氏縣令宜兼充和陵臺令仍升為赤  
縣

十月丁未改題襄宗神主廟號是日輟朝百官奉慰

臣欽

若等曰時起居郎蘇楷駁昭宗謚號太常卿  
張廷範改謚曰莊靈恭閔孝皇帝廟號襄宗

後唐莊宗同光元年四月即位閏月追尊曾祖蔚州太  
保為昭烈皇帝廟號懿祖夫人崔氏曰昭烈皇后陵曰  
永興追尊皇祖代州太保為文皇帝夫人秦氏曰文景  
皇后陵曰長寧追尊皇考河東軍節度使守太師中書  
令晉王為武皇帝詔於晉陽創中興宗廟以高祖神堯  
皇帝太宗文皇帝懿宗昭聖皇帝昭宗聖穆皇帝洎懿  
祖已下三室為七廟

十一月甲辰勅雒京太廟先為朱溫毀廢將幸雒陽宮  
告廟下尚書省會議重修本朝宗廟

二年正月丁巳所司奏懿祖昭烈皇帝八月十四日忌  
昭烈皇后十一月八日忌獻祖文皇帝十月十三日忌  
文景皇后九月六日忌太祖武皇帝正月二十日忌勅  
敬依典禮甲子西都留守張筠奏重修高祖太宗十聖  
宮殿戊辰饗太廟以皇子繼岌為亞獻皇弟存紀為終  
獻

二月丁亥遣宗正李紆朝拜和陵丁酉吏部奏十道圖內州縣名共三十七處犯獻祖廟諱勅改易之

三月中書門下奏北京三陵所宜尊奉竊尋故事宜建嘉名昭烈皇帝陵請以永興為名文皇帝陵請以長寧為名武皇帝陵請以建極為名從之

八月以宗正少卿李瓊往曹州檢行哀帝陵寢三年正月丙申勅曰朕顧惟寡德獲嗣丕圖奉先之道嘗勤送往之誠靡怠爰自重興廟社載展郊禋旋蕩滌于瑕疵

復涵濡于慶澤蓋憂勞靜國曠墜承祧御朽若驚涉川  
為懼繇是推移歲月鬱滯情懷恭念昭宗晏駕之辰少  
帝登遐之日咸罹虺毒遽殞龍髯委冠劍于仇讎託山  
陵于梟獍靜惟規制豈叶度程存愴結以彌深固寢興  
而增惕虔思改卜式慰允懷宜令所司別選園陵脩禮  
遷葬貴雪幽明之恨以申追慕之心凡百臣寮體朕哀  
感雖有是命以年饑財不足而止己亥太常禮院奏三  
月合差官朝拜諸陵宜以十八日辛巳從之癸亥湖南

馬殷奏管内州縣名有犯獻祖廟諱處道州延昌縣復舊名延唐縣彬州義昌縣改為義彰縣岳州昌江縣改為平江縣所司鑄換新印賜之

三月丙申寒食節車駕在鄴都帝與皇后出近郊遙享代州親廟

十月上皇太后謚曰貞簡皇太后陵名曰坤陵

十一月庚寅朔幸壽安號慟於坤陵

明宗天成元年四月即位七月上莊宗尊謚曰光聖神

閔孝皇帝

八月甲午廢朝以莊宗神主祔太廟禮也

十一月庚寅宗正少卿李堯奏恭陵所其山園之內被民戶起舍屋居止臺觀皆被侵耕柏城松逕樵採殆盡乞下本縣與寺司重定完本園林地畝從之

二年二月庚戌勅河南府新安縣宜升為次赤以雍陵在焉

十二月丙午追尊四代祖麟州僕射諱聿謚曰孝恭皇

帝廟號惠祖衛國夫人博陵崔氏謚曰孝恭昭皇后三代祖朔州司空諱教謚曰孝質皇帝廟號毅祖趙國夫人張氏謚曰孝質順皇后皇祖蔚州司徒琰謚曰孝靖皇帝廟號烈祖皇祖妣秦國夫人何氏謚曰孝靖穆皇后皇考汾州太師諱霓謚曰孝成皇帝廟號德祖皇妣宋國夫人劉氏謚曰孝成懿皇后以應州舊宅為廟是

中書門下又奏伏以兩漢以諸侯王入繼帝統則必易名上謚廣孝稱皇載於諸王故事孝德皇孝仁皇孝元皇是也伏乞聖慈俯從人願許取皇而薦號兼上謚以尊名改置園陵仍增兵衛遂詔太常禮院定其儀制太

常博士王丕等引漢桓帝入嗣尊其祖河間孝王曰孝  
穆皇帝蠡吾侯曰孝崇皇帝為例請付太常卿定謚刑  
部侍郎權判太常卿馬縞復議曰伏准兩漢故事以諸  
侯王宗室入承帝統亦必追尊父祖修樹園陵西漢宣  
帝東漢光武孝享之道故事具存自安帝入嗣遂有皇  
太后令別崇謚法追曰某皇所謂孝德孝穆之類是也  
前代惟孫皓自烏程侯繼嗣追父和為文皇帝事出非  
常不堪垂訓今據禮院狀漢安帝已下若據本紀又不  
見有帝字伏以謚法德象天地曰帝伏緣禮院以曾奏  
聞准將兩漢故事便述尊名請詔百官集議時右僕射  
李琪議曰伏覩歷代已來宗廟成制繼襲無異沿革或  
殊馬縞所奏禮有案據乞下制命令馬縞虔依典冊以  
述尊名時明宗意欲兼加帝字乃下詔曰朕聞開國承  
家得以制禮作樂故三皇不相襲五帝不相沿隨代創  
規于理無與矧或情闕祖禰事係烝嘗且追謚追尊稱  
皇與帝既有減增之字合陳褒貶之辭大約二名俱為

尊稱若三皇之代固不可加帝五帝之代亦不可言皇  
爰自秦朝始兼其號至若玄元皇帝事隔千祀宗追一  
原猶顯冊于鴻名豈湏尊于漢典況朕居九五之位為  
億兆之尊不可總二名于眇躬惜一字于先代苟隨所  
議何表孝誠可委宰臣與百官詳定集兩班于中書逐  
班各陳所見准李琪等請于祖禰二室先加帝宰臣合  
衆議奏曰恭以朝廷之重宗廟為先事係承祧義符致  
美且聖朝追尊之日即引漢氏舊儀在漢氏封崇之時  
復依何代故事理闕凝滯仰惟聖謨道合變通方為民  
則且王者功成治定制禮作樂正朔服色尚有改更尊  
祖奉先何妨沿革若應州必立別廟即地遠上都今據  
開元中追尊臯陶為德明皇帝涼武昭皇為興聖皇帝  
皆立廟於京都臣等商量所議追尊四聖望依御札竝  
加皇帝之號兼請于各京立廟勅宣依應州舊宅立廟  
餘依  
所奏

三年八月祠部舉新廟諱有與人姓同者請改之勅凡有姓犯廟諱者以本望為姓

閏八月辛亥勅准兵部郎中蕭愿奏大忌齋僧道各一百人列聖忌辰齋僧道五十人

十月戊申帝服袞冕御崇元殿臨軒命禮部尚書韓彥惲工部侍郎住贊往應州奉冊四廟陵樂奏仗衛如式四年正月太常奏應州四廟陵號惠祖曰遂陵毅祖曰衍陵烈祖曰奕陵德祖曰慶陵忌日行香如太廟諸室

八月戊申帝服袞御文明殿追冊昭宣光烈孝皇帝禮畢使兵部尚書盧質押冊出應天門登車鹵簿鼓吹前道入都亭驛翌日登赴曹州甲子曹州祔饗昭宣光烈孝皇帝禮畢文武百官詣西上閣門進名奉慰

十月癸酉勅昭宣光烈孝皇帝曾居寶位久抱幽冤近始追崇方安寢廟宜昇縣邑以奉園陵遂升曹州濟陰縣為次赤以本縣令兼陵令  
長興二年四月祔饗于太廟

三年七月宗正寺奏今年經大雨太廟正殿疎漏門樓墊陷宮牆及神門外仗舍竝皆缺漏請下所司修補司天以墓年不宜興造請隨缺壞處量事增修從之

閔帝應順元年二月山陵使上言太行山陵四月二十七日掩玄宮奉御札皇帝親奉靈駕至園陵有司量事供備臣等伏見累朝故事人君無親送葬之儀蓋承繼事大非薄於送終累奏不從

末帝清泰元年四月即位上明宗尊謚曰聖德和武欽

孝皇帝

十一月戊戌中書門下奏太常撰定冬至朝會儀詔曰  
初成園陵彌軫孝思遽履節辰尤增顧復所奏各仗宜  
停是月中書門下奏二十六日明宗忌羣臣奉慰行香  
固有常禮恭以陛下初遇忌辰合存降殺仰惟追感難  
抑孝思固于茲時不同常歲臣等商量請于忌辰前後  
各一日不坐從之

二年正月戊申宗正寺言北京永興長寧建極三陵應

州遂衍奕三陵曹州溫陵例下本州府長官朝拜雍坤  
和徽四陵朝廷從之乙丑遣太常少卿蕭愿宗正卿李  
郁朝拜徽陵右庶子韋華雍陵宗正少卿李知新殿中  
丞李延昭和陵太子中允劉賀太子中舍李均坤陵

二月己丑宰臣盧文紀等上章曰臣聞聖列九皇必稟  
嚴慈之訓貴為萬乘彌懷顧復之思所謂生我劬勞昊  
天罔極故漢昭帝承祧御歷奉尊謚于雲陽魏文帝繼  
體守文思外家于甄館則知追崇母后祔享廟陵愛親之

道克隆敬本之文斯洽臣等嘗覽國史見玄宗大聖孝  
明皇帝母昭成皇太后竇氏作嬪初奉于相王歷位纔  
終于藩孺及至上皇傳國聖子臨朝追尊配享於閔  
宮儷極攸先于冢后臣又見代宗睿文孝武皇帝母章  
敬太后吳氏入宮纔侍于忠王短世難登于命婦及寶  
祚爰歸于聖嗣追尊將祔于陵園以故羣臣慙懇于封函  
嚴配請崇于徽號舊章斯在闕禮未伸臣等叨備鼎司  
合伸茂典伏惟聖母魯國太夫人夢梓興周望雲佐漢

亶河洲之懿範契沙麓之休祥三母俱賢周武最承于  
天統四妃有子唐侯光啟于帝圖仰惟當宁之懷彌軫  
寒泉之思伏望配陵祔廟法地則天君親實殺于義方  
恩禮宜歸于聖善母以子貴乃春秋之格言孝以尊親  
固禮經之明義久虛時薦慮損皇猷俾秦官載顯于玉  
符魏寢永光于金冊斯華夷大願臣子遑寧臣等謹案  
謚法聖善周聞曰宣施而不私曰宣博聞多能曰憲聖  
善周達曰憲謹上尊謚曰宣憲皇太后請依昭成章敬

二太后故事禮合配陵祔廟擇日備禮冊命臣等  
再詳儀注備有典彝伏恐朝廷且務于便安司局責期  
于辦集謹酌故事更司簡詳臣等伏聞先太后舊陵未  
祔于先朝則都下難崇于別廟既追尊謚合創閼宮臣  
等謹案漢故事園寢不在王畿者或在陵所便立寢祠  
禮文雖異于國朝事理可循于權道臣等商量太后上  
尊謚後權立祠廟以伸告獻配祔之禮請俟他年詔曰  
朕猥以眇質獲嗣丕圖暑徃寒來知昊天之罔極憂深

思遠唯觸地以無容卿等學究源流文苑體要以致財  
成之美復陳孝理之規援引古今鋪陳茂實導朕以愛  
親之禮勉朕以追遠之文取則昭成明徵章敬仍加美  
謚益見忠誠至於權立閼宮頗亦叶於時變劬勞莫報  
長懸陟屺之心聖善斯崇且慰循陔之念謹依典禮哀  
慕增深

六月乙丑太常卿李憚定宣憲太后陵號請以順為名  
三年五月太常奏于河南府東權立宣憲皇后寢宮從

之

六月御敷政殿遣工部尚書崔居儉奉宣憲皇太后寶冊于寢宮時陵園在河東適會兵興故權于京城修奉寢宮上謚焉

九月戊申帝親行太原太常博士段顥白宰臣曰帝未嘗謁陵今河陽路當徽陵前安得經繇不行禮乎是日午時至陵園于仗舍前陳謁陵禮

晉高祖天福二年正月壬戌中書奏皇帝到京未立宗

廟者夫以受命握圖既啟無疆之祚宗文祖武宜遵有  
國之規伏惟皇帝陛下歷數在躬艱難創業拯黔黎之  
塗炭廓宇宙之氛霾寰區既定于一戎基構方開於萬  
祀恭惟宇廟湏切追崇將示肅恭豈宜稽緩臣等商量  
望令所司速具制度典禮以聞尊始敬先既光于太后  
徽章茂典永顯于洪猷從之

五月太常卿梁文矩奏奉勅旨定四廟謚號廟號陵號  
者伏以四代祖朔州使君府君自天所祐應時而生肇

啟靈源始基鴻業謹案謚法寬容平和曰安臨事屢斷  
撫俗多方有明達之能無屈撓之事豈不謂之寬容平  
和乎又靖者柔德教衆之義義者行己不失者也  
請備神主追尊謚曰孝安皇帝廟號靖祖陵號義陵三  
代祖右省常侍府君動靜有常夙夜匪懈憂人若已視  
民如傷謹案謚法一德不懈曰簡富且不驕貴而好禮  
有典有則無怠無荒豈不謂一德不懈乎又肅者剛德  
克就之義惠者寬裕不苛者也請備神主追尊謚曰孝

簡皇帝廟號肅祖陵號惠陵皇祖振武僕射府君淳德  
不雜素風自高得安邊靜塞之機有阜俗濟民之術謹  
案謚法執事有制曰平積善積德允武允文動不為身  
行唯濟物豈不謂執事有制乎又翼者思慮深遠之義  
康者安樂撫民者也請備神主追尊謚曰孝平皇帝  
廟號翼祖陵號康陵皇考洺州太傅府君天資睿德神  
贊沈機臨戎則有敵必摧撫恤則無民不悅謹案謚法  
主善行德曰元盡善盡美乃神乃聖功煥龍圖慶流鳳

宸豈不謂主善行德乎又憲者博聞多能之義昭者明德有功者也請備神主追尊謚曰孝元皇帝廟號憲祖陵號昭陵勅所定翼祖宜改為睿祖昭陵改為昌陵餘竝敬依又太常少卿裴坦奏奉勅定四廟皇后追尊謚議者伏惟四代祖妣秦氏積行芝蘭含貞閨壺徽猷令問厥彰內則之賢懿靜柔明綽有禮閑之節諒非餘慶何啓昌期謹案謚法宣慈惠和曰元請追尊謚曰孝安元皇后伏惟三代祖妣安定太君安氏門稱盛族代謂

良家修德行而義冠稽天蘊柔明而風昭齊體若非淑  
惠寧協休徵謹案謚法曰貴賢尚義曰恭請追尊謚曰  
孝簡恭皇后伏惟皇祖妣高平縣太君米氏令惠生知  
賢才天稟四德早聞於親戚一齊仍著于閨庭淑問常  
彰貞柔自固謹案謚法嚮惠德義曰獻請追尊謚曰孝  
平獻皇后皇妣南陽郡太夫人何氏族惟華貴德乃寬  
冲禮諧義聽之文詩協和鳴之詠履大跡而鍾慶祔神  
龍而克祥固有靈符來弘景祚謹案謚法溫柔聖善曰

懿請追尊謚曰孝元懿皇后勅敬典禮

七月壬申帝御崇元殿備禮命使冊四廟于雒京以四  
代祖朔州府君為孝安皇帝廟號靖祖以高祖妣秦氏  
為孝安元皇后以曾祖右省常侍府君為孝簡皇帝廟  
號肅祖以曾祖妣安定郡太君安氏為孝簡恭皇后以  
太王父振武僕射府君為孝平皇帝廟號睿祖以皇祖  
妣高平縣太君米氏為孝平獻皇后以皇考雒州太傅  
府君為孝元皇帝廟號憲祖皇妣南陽郡太夫人何氏

為孝元懿皇后

三年二月辛丑中書奏禮經云禮不諱嬖名二名不偏諱注云嬖名謂音相近若禹與雨丘與區也二名不偏諱謂孔子之母名徵在言在不稱徵言徵不稱在此古禮也唐太宗二名竝諱玄宗二名亦同人姓與國諱音聲相近是嬖名者亦改姓氏與古禮有異廟諱平聲字即不諱餘三聲諱側聲不諱平聲字所諱字玉文及偏旁闕點畫望依令式施行勅朝廷之制今古相沿道在

人弘禮非天降況以方開歷數虔奉祖宗雖喻孔子之  
文未爽周公之訓冀崇孝行永載簡編取為二名及嫌  
名事宜依唐禮施行乃付所司五月丁巳勅應諸州縣  
名犯廟諱等相南管內資興縣本州名犯肅祖孝簡皇  
帝廟諱宜改為敦州州管縣名與州名同改為敦化縣  
義縣上一字亦與本州名同改為敦和縣武岡縣本州  
名與憲祖孝元皇帝廟諱上一字音同宜改為敏州州  
管陽縣上一字與州名同改為敏政縣嶺南晉興縣本

州名與孝元皇帝廟諱下一字音同改為鉞州建州管武縣上一字亦與憲祖孝皇帝廟諱上一字音同改為昭武縣其已前州府縣上中下仍准舊制為定

五年二月乙巳御史中丞竇貞固奏國忌日宰臣跪爐焚香僧人表讚孝思述祖先違世之事而文武百辟儼然列坐竊惟禮非天降酌在人情今古通規君親至敬對佛像行香之日實帝王不樂之辰豈有聽烈祖之舊勲悉安所坐聞明君之至德曾不暫興考經雖謂其相

承度禮深疑其有失欲請跪爐仍舊餘依常位立班詔  
可其言仍令行香之後飯僧百人永為定制

少帝以天福七年六月即位上高祖尊謚曰聖文章武  
孝皇帝十月中書奏太常禮院狀申高祖十二月二十  
日祔饗于太廟禮畢合定逐年四季郊壇配坐准禮例  
逐年勘造祠祭期日及編附令式伏請奏聞宣下者靖  
祖孝安皇帝配冬至祀昊天上帝夏至祭皇地祇肅祖  
孝簡皇帝配上辛祀昊天上帝孟冬祭神州地祇睿祖

孝平皇帝配孟夏雩祀昊天上帝憲祖孝元皇帝配季秋大饗祀昊天上帝以前天福二年七月勅配座伏緣高祖祔廟請憲祖配孟冬祭神州地祇高祖配季秋大饗祀昊天上帝從之

八年二月以寒食節帝幸南莊遙奠顯陵焚御衣衣著紙錢至暮還宮

開運二年正月宗正卿石光贊上言園陵宗廟請依古義時節薦新從之

漢高祖初即位追尊太祖高皇帝世祖光武皇帝為不  
祧廟以親廟高祖司徒府君諱上謚曰明元皇帝廟號  
文祖高祖母隴西郡夫人李氏謚曰明貞皇后曾祖太  
保府君諱上謚曰恭僖皇帝廟號德祖曾祖母號國太  
夫人楊氏謚曰恭惠皇后烈祖太傅府君諱上謚曰昭  
獻皇帝廟號翼祖烈祖母曾國太夫人李氏謚曰昭穆  
皇后烈考太師府君諱上謚曰章聖皇帝廟號顯祖烈  
妣吳國太夫人安氏謚曰章懿皇后

乾祐元年正月吏部奏鄧州臨湍縣下一字犯文祖明  
元皇帝廟諱勅改為臨瀨縣仍付所司

隱帝以乾祐元年二月即位上高祖尊謚曰睿文聖武  
昭肅孝皇帝

十二月奉六廟神主于雒陽命宰臣蘇禹珪使副太府  
卿劉皞冊焉

二年兵部員外郎盧瓊上言恭以高祖皇帝驅除戎虜  
救解倒懸德被生民功高邃古請依西漢祖宗故事于

三京陝府許宋等州舊邸立別廟塑像以時裡祀以表遺愛從之

周太祖廣順元年二月癸丑寒食節帝出玄化門至蒲池設御幄遙拜諸陵用家人之禮也

五月辛未太常卿邊蔚上追尊四廟謚議皇高祖諱璟請上尊謚曰睿和皇帝廟號信祖陵曰溫陵皇高祖妣夫人張氏請上尊謚曰睿恭皇后皇曾祖太保諱諡請上尊謚曰明憲皇帝廟號僖祖陵曰齊陵皇曾祖妣鄭

國夫人申氏請上尊謚曰明孝皇后皇祖太傅諱蘊請  
上尊謚曰翼順皇帝廟號義祖陵曰節陵皇祖妣陳國  
夫人韓氏請上尊謚曰翼敬皇后聖考太師諱簡請上  
尊謚曰章肅皇帝廟號慶祖陵曰欽陵聖妣燕國夫人  
王氏請上尊謚曰章德皇后又內出忌辰信祖四月七  
日睿恭皇后十月二十七日僖祖十二月七日明孝皇  
后正月十二日義祖五月元日翼敬皇后十一月十四  
日其三祖忌辰皇帝不視事宰臣百官赴佛寺行香慶

祖九月十四日章德皇后三月十八日忌辰皇帝不視事一日宰臣百官西上閣門進名奉慰後赴佛寺行香勅敬依典禮

七月癸酉太廟冊禮使馮道等至西京廟每室讀寶冊行祔饗之禮從西第一室信祖睿和皇帝睿恭皇后張氏祔饗第二僖祖明憲皇帝明孝皇后申氏祔饗第三義祖翼順皇帝翼敬皇后韓氏祔饗第四慶祖章肅皇帝章德皇后王氏祔饗宰臣百官進名奉慰辛酉帝被

袞冕御崇元殿授四廟四室寶冊於冊禮使中書令馮道等是日侍中進冊中書令進寶太祖降階受之淒然感慟

八月庚子賜冊太廟使及行事官綵帛銀器有差

二年三月丁巳寒食節太祖幸城南園申遙奠之敬用家人之禮也

十二月南郊大禮使中書令馮道自西京奉太廟神主至羣臣班于西御園之東帝郊迎望輿再拜有司相禮

廟主就行廟幄親行奠饗禮畢帝移蹕太廟門俟神輿至再拜百官陪位皆再拜宮闈令奉神主于四室帝設奠行祔饗禮畢還宮

三年七月太常上言祭禮宗廟之祀三年一祫以孟冬五年一禘以孟夏恭惟追尊四廟經今三年准禮合改十月孟冬薦享為祫從之是月命兵部侍郎邊歸讜朝拜漢睿陵潁陵

世宗顯德元年正月即位三月上太祖尊謚曰聖神恭

肅文武孝皇帝

六月親征河東廻至新鄭縣丙寅親拜嵩陵望陵號慟  
至陵俯伏悲泣哀感左右拜跪祭奠而退賜奉陵將吏  
及近郊人戶帛有差

五年四月遷五廟神主入于新廟先是以舊太廟在天  
街之側患為囂塵所及故改創今廟制度宏壯不日而  
成時帝征淮南車駕在行權東京留守王朴率留司百  
官奉迎神主以安于室

六月禘於太廟

恭帝以顯德六年六月即位八月上世宗尊謚曰睿武  
孝文皇帝

冊府元龜卷三十一

欽定四庫全書

冊府元龜卷三十二上

宋 王欽若等 撰

帝王部

崇祭祀

書曰先王顧諟天之明命以承上下神祇洪範八政三  
曰祀禮大宗伯之職曰以吉禮事邦國之鬼神祇故祭  
天曰燔柴祭地曰瘞埋祭山曰廋縣祭川曰浮沉祭星  
曰布祭風曰磔是類是禡師祭也既伯既禱馬祭也除

惡之祭為祓會福之祭曰禴告事求福曰禱道上之祭為祖潔意以享為禋以類祭神為禋祭司命為祧祭豕先為禴月祭為禴禱雨為雩禱明為禋是以聖王為之典禮民之精爽不貳齊肅聰明者神或降之乃有神明之官各司其序不相亂也民神異業恭而不黷所以神降之嘉生民以物序災禍不至所求不匱歷代人君罔不偏走羣望咸秩無文故神農播種始諸飲食致恭鬼神顒頊亦潔誠以祭祀其後成湯至于帝乙罔不明德

恤祀所以陰陽和而萬物遂也詩云以享以祀以介景福又云俾爾彌爾性百神爾主矣故祭之言察也察者至也言人事至于鬼神也是知神不可慢祭不可黷盖享於至誠者耳豈犧牲玉帛云乎哉

共工氏霸九州其子曰句龍能平水土死為社祠

烈山氏王天下其子曰柱能殖百穀死為稷祠伊耆氏

始為蜡

伊耆氏古天子號

舜在璿璣玉衡以齊七政肆類于上帝禋于六宗望于

山川徧于羣神

史記徧作辨

湯伐桀欲遷夏社不可作夏社

應劭曰遭天旱七年明德以薦而旱不止故遷

社以棄代為稷欲遷句龍德莫能繼故作夏社說不可遷之義

遷字廼遷烈山子柱而

以周棄代為稷祠

周文王巡守而祀四嶽河海作般之詩

成王立周公相王道大洽制禮作樂天子曰明堂辟雍

諸侯曰泮宮郊祀后稷以配天宗祀文王於明堂以配

上帝四海之內各以其職來助祭天下名山大川懷柔

百神咸秩無文五嶽視三公四瀆視諸侯而諸侯祭其疆內名山大川大夫祭門戶井竈中雷五祀士庶人祖考而已各有典禮而淫祭有禁是時巡守告祭柴望作時邁之詩春夏祈穀于上帝作噫嘻之詩郊祭祀天地作昊天有成命之詩

漢高祖初起禱豐粉榆社狗沛為沛公則祀蚩尤釁鼓

旗漢書本紀載高祖立為沛公祠黃帝祭蚩尤于沛庭而釁鼓遂以十月至霸上立

為漢王

二年東擊項籍而還入關問故秦時上帝祀何帝也對  
曰四帝有白青黃赤帝之祠高祖曰吾聞天有五帝而  
四何也莫知其說於是高祖曰吾知之矣廼待我而具  
五也廼立黑帝祠名曰北時有司進祠上不親徃悉召  
故秦祀官復置太祝太宰如其故儀禮因令縣為公社

公社  
官社

下詔曰吾甚重祀而敬祭今上帝之祭及山川諸

神當祠者各以其禮時祠如故

後四歲天下已定詔御  
史令豐治粉榆社嘗以

春時以羊彘祀之時令祝立蚩尤之祠於長安置祠祀  
官女巫其梁巫祠天地天社天水房中堂上之屬晉巫

祠五帝東君雲中君巫社巫祠族人炊之屬秦巫祠社主巫保族累之屬荆巫祠堂下巫先司命施糜之屬九天巫祠九天皆以歲時祠宮中其河巫祠河于臨晉而南山巫祠南山秦中秦中者二世皇帝也各有時日其後二歲或言曰周興而邑立后稷之祠至今血食天下又制詔御史其天下立靈星祠嘗以歲時祠以牛

十年春有司請令縣嘗以春二月及臘祠稷以羊彘民

里社各自裁以祠制曰可

高帝以來名山大川在諸侯諸侯祝各自奉祠天子官不

領及文帝時齊淮南國廢令太祀盡以歲時致禮如故

文帝十三年以歲比登詔有司增雍五時路車各一乘

駕被具

駕車被馬之文節皆具也

西時畦時寓車各一乘寓馬四匹

駕被具河湫漢水玉加二及諸祀皆廣壇場珪幣俎豆以差加之

十四年詔曰朕獲執犧牲珪幣以事上帝宗廟十四年于今歷日彌長以不敏不明而久撫臨天下朕甚自媿其廣增諸祀壇場珪幣昔先王遠施不求其報望祀不祈其福右賢左戚先民後已至明之極也今吾聞祀官祝釐音僊福也皆歸福于朕躬不為百姓朕甚媿之夫以朕之不德而專鄉獨美其福百姓不與音預焉是重直用切吾

不德也其令祠官致敬無有所祈

十五年黃龍見成紀詔曰有異物之神見于成紀毋害

于民歲以有年朕幾

幾讀曰冀

郊祀上帝諸神禮官議毋諱

以朕勞

無諱以成其勞自言不以為勞也

有司皆曰古者天子夏親郊

祀上帝於郊故曰郊於是夏四月文帝始幸雍郊見五

時祠衣皆尚赤赦天下修名山大川常祀而絕者有司

以歲時置禮

先是趙人新垣平以望氣見上言長安東北有神氣成五采若人冠冕焉或曰東北

神明之舍西方神明之墓也天瑞下宜立祠上帝以合符應於是作渭陽五帝廟同宇帝一殿面五門各如其

帝色祠所用及儀亦如雍五畤明年夏四月文帝親拜霸渭之會以郊見渭陽五帝廟臨渭其北穿蒲池溝水燿火舉祠若光輝然屬天焉於是貴平至上大夫賜累千金而使博士諸生刺六經中作王制謀議巡狩封禪事文帝出長門若見五人道北遂因其直立五帝壇祠以五牢

孝景帝即位十六年祠官各以歲時祠如故

武帝建元元年五月詔曰河海潤千里其令祠官修山川之祠為歲事曲加禮

元光二年十月行幸雍祠五畤

郊祀志云後當三歲一郊見

元狩元年十月行幸雍祠五畤獲白麟

二年十月行幸雍祠五時

元鼎四年十月行幸雍祠五時

十一月甲子立后土祠于汾陰脽上

五年十月行幸雍祠五時

十一月辛巳朔旦冬至立泰時于甘泉天子親郊見朝  
日夕月詔曰朕以眇身託于王侯之上德未能綏民  
或饑寒故巡祭后土以祈豐年冀州脽壤廼顯文鼎獲  
薦於廟渥洼水出馬朕其御焉戰戰兢兢懼不克任思

昭天地內惟自新詩云四牡翼翼呂征不服親省邊陲

用事所極望見泰一修天文禮

禮古禪字

辛卯夜若景光十

有二明易曰先甲三日後甲三日朕甚念年歲未咸登

飭躬齊戒丁酉拜況于郊

賜也

元封元年正月詔曰朕用事華山至于中嶽獲駿鹿見

夏后啟母石

啟生而母化為石在嵩高山下

翼日親登嵩高御史乘屬

在廟

天子出御史除二人為乘曹護車駕

吏卒咸聞呼萬歲者三祭禮罔

不答其令祠官加增太室祠禁無伐其草木呂山下戶

三百為之奉邑名曰崇高獨給祠復亡所與

二年十月行幸雍祠五畝春幸緱氏遂至東萊夏四月  
還祠泰山

四年祠后土詔曰朕躬祭后土地祇見光集于靈壇一  
夜三燭幸中都宮殿上見光其赦汾陰夏陽中都死罪  
呂下賜三縣及楊氏皆無出今年租賦

五年冬南巡狩至于盛唐遂北至琅邪竝海所過禮祠  
其名山大川增封太山還幸甘泉郊泰畤

六年三月行幸河東祠后土

天漢元年正月行幸甘泉郊泰畤

三月行幸河東祠后土

太始三年三月幸琅邪禮日成山登山登之罘浮大海山呼

萬歲

四年三月行幸太山祠明堂

四月幸不其

不其山名

祠神人於交門宮若有鄉坐拜者

漢注

云神竝見且白且黑且大且小鄉坐三拜鄉讀曰嚮坐音才卧反

作交門之歌

後元元年正月幸甘泉郊泰畤

帝即位无敬鬼神之祠漢興已六十餘歲矣天

下又安縉紳之屬皆望天子封禪改正度也而上鄉儒術招賢良趙綰王臧等以文學為公卿欲議古立明堂城南以朝諸侯草巡狩封禪改歷服色事未就竇太后不好儒術使人微伺趙綰等姦利事案綰臧自殺諸所興為皆廢六年竇太后終其明年徵文學之士明年上初至雍郊見五畤後嘗三歲一郊見亳人謬忌奏祠泰畤一方曰天神貴者泰一泰一佐曰五帝古者天子以春秋祭泰一東南郊日一太牢七日為壇開八通之鬼道於是天子令大祝立其祠長安城東南郊嘗奉祀如忌方其後人上書言古者天子三年一用太牢祠三一天一地一泰一天子許之令太祝領祠之於忌泰一壇上如其方後人復有言古天子嘗以春解祠祠黃帝用一臬破鏡冥羊用羊祠馬行用一青牡馬泰一臬山山君用牛武夷君用乾魚陰陽使者以一牛令祠官領之如

其方而祠泰一於忌泰一壇旁元狩二年天子郊雍詔曰今上帝朕親郊而后土無祀則禮不答也有司與太史令談祠官寬舒議天地牛角繭栗今陛下親祠后土后土宜於澤中園丘為五壇壇一黃犢牢具已祠盡瘞而從祠衣上黃於是天子東幸汾陰汾陰男子公孫滂洋等見汾旁有光如絳上遂立后土祠於汾陰睢上如寬舒等議上親望拜如上帝禮後郊雍至隴西登崆峒幸甘泉令祠官寬舒等具泰一祠壇放亳忌泰一壇三畎五帝壇環居其下各如其方黃帝西南除八通鬼道泰一所用如雍一時物而加醴棗脯之屬殺一犛牛以為俎豆牢具而五帝獨有俎豆醴進其下四方地為腹食犛神從者及比斗云已祠胙餘皆燎之其牛色白白鹿居其中氐在鹿中水而酒之祭日以牛祭月以羊是特泰一祝宰則衣紫及繡五帝各如其色日赤月白十一月辛巳朔旦冬至昉天子始郊泰一朝朝日夕月則揖而見泰一如雍郊禮其贊饗曰天始以寶

鼎神策授皇帝朔而又朔終而復始皇帝敬拜見焉而衣上黃其祠列火滿壇壇旁享炊具有司云祠上有光公卿言皇帝始郊見泰一雲陽有司奉瑄玉加牲薦饗是夜有美光及畫黃氣上屬天太史令談祠官寬舒等曰神靈之休祐福兆祥宜因此地光域立泰畤壇以明應令太祝領秋及臘間祠三歲天子一郊見太初二年有司言雍五畤無牢孰具芬芳不備乃令祠官進畤犢牢具已食所勝而以木寓馬代駒云及諸名山川用駒者悉以木寓馬代獨行過親祠廼用駒它禮如故武帝諸所興如亳忌泰一及冥羊馬行赤星五鼎寬舒之祠官以歲時致禮凡六祠皆太祝領之至如八神人謬忌凡它山名祠行過則祠去則犛牛土所興祠各自主其人終終則已祠官不主它祠皆如故甘泉泰一汾陰后土三年親郊祠而泰山五年一修封武帝凡五修封

宣帝神爵元年正月行幸甘泉郊泰畤

三月行幸河東祠后土

帝即位霍光輔政上共已正南面非宗廟之祀不出至十二年

乃下詔曰蓋聞天子尊事天地修祀山川古今通禮也間者上帝之祠闕而不親十有餘年朕甚懼焉然朕親飭躬齊戒親奉祀為百姓蒙嘉氣獲豐年焉明年正月上始幸甘泉郊見泰時數有靈祥修武帝故事盛車服敬齊祀之禮頗作詩歌後制詔太常夫江海百川之大者也今闕焉無祀其令祠官以禮為歲事以四時祠江海雒水祈為天下豐年焉自是五嶽四瀆皆有常禮祀東嶽泰山於博中嶽泰室于嵩高南嶽瀟山於瀟西嶽華山於華陰北嶽恒山於上曲陽河於臨晉江於江都淮於平氏濟於臨邑界中皆使者持節侍祠唯泰山與河歲五祠江水四餘皆一禱而三祠云時南郡獲白鹿獻其皮牙爪上為立祠又以方士言為隨侯劍寶玉寶璧周康寶鼎立四祠於未央宮中又祠太室山於即墨三戶山於下密祠天封苑火井於鴻門又立歲星辰星太

白熒惑南斗祠於長安旁又祠三山八神於曲城蓬萊  
山石社鼓於臨胸之罌山於脰成山於不夜萊山於黃  
成山祠曰萊山祠月又祠四時於琅邪蚺尤於壽良京師  
近縣鄆則旁谷五牀山月日五帝仙人玉女祠雲陽有  
徑路神祠祭休屠王也又立五龍山仙人祠黃帝天神帝原水凡四祠於膚施

五鳳元年正月行幸甘泉郊泰畤昭帝即位富於春秋未嘗巡祭至此始復  
行

二年三月行幸雍祠五畤

三年三月行幸河東祠后土

甘露元年正月行幸甘泉郊泰畤

三年正月行幸甘泉郊泰畤

黃龍元年正月行幸甘泉郊泰畤

孝元初元二年正月行幸甘泉郊泰畤

四年正月行幸甘泉郊泰畤

三月行幸河東祠后土

永光元年正月行幸甘泉郊泰畤

帝即位遵舊儀間歲正月一幸甘泉郊泰

畤又東至河南祠后土西至雍祠五畤凡五奉泰畤后土之祠亦施恩澤時所過毋出田租賜百戶牛酒或賜

爵赦罪人

成帝建始元年十二月作長安南北郊罷甘泉汾陰

二年正月罷雍五畤辛巳上始郊祀長安南郊詔曰廼

者徙泰畤后土于南郊北郊朕親飭躬郊祀上帝皇天

報應神光竝見三輔長無共張繇役之勞

共音居庸切張音竹亮切

赦奉郊縣長安長陵

天郊在長安南地郊在長安城北長陵界中二縣有奉郊之勤故一

切竝赦之

及中都官耐罪徒

中都官京師諸官府

減天下賦錢筭四十

三月辛丑始祀后土於北郊

永始二年十一月行幸雍祠五畤

三年三月行幸雍祠五時

十一月皇太后詔有司復甘泉泰時汾陰后土雍五時陳

倉陳寶祠

四年正月行幸甘泉祠泰時

三月幸河東祠后土

元延二年正月行幸甘泉郊泰時

四年正月行幸甘泉郊泰時

三月行幸河東祠后土

綏和元年三月行幸雍祠五時

二年三月行幸河東祠后土

帝即位丞相衡御史大夫譚等奏甘泉泰畤河東后

土祠可徙置長安及議罷不應禮神祠事具掌禮部奏議門明年衡譚坐事免官爵衆庶多言不當變動祭祀者又初罷甘泉泰畤作南郊日大風壞甘泉竹宮折拔畤中樹木十圍以上百餘天子異之以問劉向對曰家人尚不欲絕種祠況於國之神寶舊畤且甘泉汾陰及雍五畤始立皆有神祇感應應然後營之非苟而已也武宣之世奉此三神禮敬敕備神光尤著祖宗神祇舊位誠未易動及陳寶祠自秦文公至今七百餘歲矣漢興世世嘗來光色赤黃長四五丈直祠而息音聲碎隱野雞皆雉每見雍太祝寺以太牢遣侯者乘傳馳詣行在所以為福祥高祖畤五來文帝二十六來武帝七十五來宣帝二十五來初元元年以來亦二十來此陽氣舊祠也及漢宗廟之禮不得擅議皆祖宗之君與賢臣所共定古今異制經無明文至尊至重難以疑說正也前

始納貢禹之議後人相因多所動搖易大傳曰誣神者殃及三世恐其咎不獨止禹等上意恨之後上以無繼嗣故令皇太后詔有司曰蓋聞王者承事天地交接泰一尊莫著於祭祀孝武皇帝大聖通明始建上下之祀營泰畤於甘泉定后土於汾陰而神祇安之饗國長久子孫蕃滋累世遵業福流於今今皇帝寬仁順孝奉循聖緒靡有大愆而久無繼嗣思其舊職殆在徙南北郊違先祖之制改神祇舊位失天地之心以防繼嗣之福春秋六十未見皇孫食不甘味寢不安席朕甚悼焉春秋大復古善順祀其復甘泉泰畤汾陰后土如故及雍五畤陳寶祠在陳倉者天子復親郊祀如前又復長安雍及郡國祠著明者且半後成都侯王商為大司馬衛將軍輔政杜鄴說商曰東隣殺牛不如西隣之禴祭言祭天之道貴以誠質大得民心也行穢祀豐猶不蒙祐德修薦薄吉必大來古者壇場有常處燎裡有常用贊見有常禮犧牲玉帛雖備而財不匱車輿匠役雖動而

用不勞是故每舉其禮助者歡說大路所歷黎元不知  
今甘泉河東天地郊祀咸失方位違陰陽之宜及雍五  
時皆曠遠奉遵之役休而復起繕治供張無解已時皇  
天著像殆可畧知前上甘泉先驅失道禮月之夕奉引  
復迷祠后土還臨河當渡疾風起波船不可御又雍大  
雨壞平陽宮垣廼三月甲子雷電災林光宮門祥瑞未  
著咎徵仍臻近三郡所奏皆有變故不答不饗何以堪  
此詩曰率繇舊章先王法度文王以之交神于祀子孫  
千億宜如異時公卿之議復還  
長安南北郊後皇太后詔復之

哀帝即位寢疾盡復前世所嘗興諸神祠官凡七百餘  
所一歲三萬七千祠

平帝元始四年正月郊祀高祖以配天宗祀孝文以配

上帝

時王莽奏請議正五帝兆并立官稷事具帝王禮部奏議門

後漢光武建武元年六月己未即位于鄗為壇營於鄗之陽祭告天地采用元始中郊祭故事八月壬子祭社稷

二年正月壬子立大社大稷于雒陽在宗廟之右方壇無屋有墻門而已二月八日及臘一歲三祠皆太牢具使有司祠又立郊兆于城南七里

中元二年正月辛未初立北郊祠后土

明帝永平二年正月辛未初祀五帝於明堂光武帝配

冊府元龜卷三十二上

欽定四庫全書

冊府元龜卷三十二下

宋 王欽若等 撰

帝王部 三十二

崇祭祀

章帝元和二年二月甲寅詔曰今山川百神應典禮者  
尚未咸秩其議增修羣祀以祈豐年是月東巡狩辛未  
柴祭天地羣神如故事壬申宗祀五帝於孝武所作汶  
上明堂以光武帝配如雒陽明堂祀

四月還京都為靈臺十二門作詩各以其月祀而祭之

三年二月戊辰幸中山遣使者祀北嶽出長城

史記蒙恬為秦

築長城西自臨洮東至海

三月乙卯進幸趙庚辰祠房山於靈壽

靈壽縣名屬常山郡房山今在

鎮州房山縣西北俗名王母山上有王母祠

安帝元初六年三月庚辰始立六宗祀於雒城

時尚書歐陽說

謂六宗者在天地四方之中為上下四方之宗禮比太社也

延光三年二月辛卯幸太山柴告岱宗

太山王者告代之處為五嶽之

宗故曰岱宗  
燔柴以告天

壬辰宗祀五帝于汶上明堂

靈帝熹平五年四月復崇嵩高名為嵩高

前書武帝祠中  
嶽改嵩高為崇

高東觀漢紀曰使中郎將堂谿典  
請雨因上言改之名為嵩高山

獻帝建安元年七月甲子至雒陽丁丑郊祀上帝

八年十月己巳公卿初迎冬於北郊

斯禮久廢  
故曰初

總章始

復備八佾

袁宏記云迎氣北郊始用八佾舞列也舞者  
之行列往因亂廢今始備之總章樂官名古

之安

代樂

魏文帝黃初元年十一月庚午即阼於繁陽燎祭天地  
五嶽四瀆

二年正月郊祭天地明堂甲戌校獵至原陵乙亥朝日  
于東郊是年六月庚子初祀五嶽四瀆咸秩羣祀瘞沉  
珪璧

四年七月乙未大軍當出使太常以特牛一告祠于郊  
六年八月帝以舟師入淮九月遣使者沉璧于淮

明帝太和元年正月郊祀武帝以配天宗祀文皇於明

堂以配上帝

二月丁亥朝日于東郊

八月己丑夕月于西郊

四年八月辛巳行東巡遣使者以特牛祠中嶽

魏書曰  
行過繁

昌使執金吾臧霸行太尉事以特牛祀受禪壇

景初元年十月乙卯始營雒陽南委粟山為園丘詔曰

昔漢氏之初承秦滅學之後採撫殘缺以備郊祀自甘

泉后土雍宮五畤神祇兆位多不經見是以興廢無常

一彼一此四百餘年廢無禘禮古代之所更立者遂有闕焉曹氏世系出自有虞氏今祀圜丘以始祖帝舜配號圜丘曰皇皇帝天方丘所祭曰皇皇后地以舜妃伊氏配天郊所祭曰皇天之神以太祖武皇帝配地郊所祭曰皇地之祇以武宣皇后配宗祀皇考高祖文皇帝於明堂以配上帝

十二月壬子冬至始祀皇皇帝天于圜丘以始祖有虞帝舜配自正始以後終魏世不復郊祀

陳留王咸熙元年正月幸長安使者以璧幣祀華山

晉武帝泰始二年正月詔曰有司前奏郊祀權用魏禮朕不慮改作之難令便為永制衆議紛紜遂不時定不得以時供饗神祇配以祖考日夕難企貶食忘安其便郊祀時羣臣又議五帝即天地王氣時異故殊其號雖名有五其實一神明堂南郊當除五帝之坐五郊改五精之號皆同稱昊天上帝各設一座而已地郊又除先後配祀帝悉從之

二月丁丑郊祀宣皇帝以配天宗祀文皇帝於明堂以配上帝

十一月有司議奏古者丘郊不異宜并園丘方丘於南  
北郊更修立壇兆其二至之祀合於二郊帝又從之一  
如宣帝所用王肅議也是月庚寅冬至帝親祀園丘於  
南郊自是後園丘方澤不別立

太康二年正月有司奏春分依舊請車駕祀朝日寒溫  
未遑可不親出詔曰禮儀宜有常若如所奏與故太尉

所撰不同復為無定制也間者難未平故每從所奏

今戎事弭息惟此為大

按詔帝復為親祀也

三年正月帝親郊祀皇太子悉侍祠

九年三月壬辰初并二社為一

前漢但置官社而無官稷莽置官稷後復故漢

至魏但太社有稷而官社無稷故嘗二社一稷也晉初仍魏無所增損至太康九年建宗廟而社祀壇與廟俱徙乃詔曰社實一神其無二社之祀

十年六月庚子復置二社

十月詔曰孝經郊祀后稷以配天宗祀文王於明堂以

配上帝而周官云祀天旅上帝又曰祀地旅四望望非地則明上帝不得為天也往者衆議除明堂五帝位考之禮文不正且詩序曰文武之功起于后稷故推以配天焉宣帝以神武創業既已配天復以先帝配天於義亦所不安其復明堂及南郊五帝位

惠帝元康六年祿壇石中破為二詔更鑄石令如舊置高祿壇上埋破石入地一丈

元帝大興二年春始議立郊祀儀

尚書令刁協國子祭酒杜夷議宜須旋都

雒邑乃脩之司徒荀組據漢獻帝都許郡便立郊自宜於此脩奉驃騎王導僕射荀崧太常華恒中書侍郎庾亮皆同組議事遂施行立南郊於巳地其制度皆太常賀循所定多依漢及晋初之儀三月辛卯帝親郊饗配之禮一依武帝始郊故事是時尚未立北壇地祇衆神共在天郊

明帝大寧三年七月詔曰郊祀天地帝王之重事自中興以來惟南郊未曾北郊四時五郊之禮都不復設五嶽四瀆名山大川載在祀典應望秩者悉廢而未舉主者其依舊詳處

成帝咸和八年正月追述明帝前旨於覆州山南立北

郊天郊則五帝之佐日月五星二十八宿文昌北斗三台司命軒轅后土天一太一太微鉤陳北極雨師雷電司風伯老人凡六十二神也地郊則五嶽四望四海四瀆五湖五帝之佐沂山嶽山白山霍山醫無閭山蔣山松江會稽山錢塘江先農凡四十四神也江南諸小山蓋江左所立猶如漢西京關中小水皆有祭秩也是月辛未祀北郊始以宣穆張皇后配地魏氏配地事皆非晉舊也

康帝建元元年正月辛未南郊辛巳北郊帝皆親奉

後魏道武登國元年即代王位于牛川西向設祭告天禮成

天興元年七月遷都平城始立社稷并立壇兆告祭天

地

二年正月甲子初祠上帝於南郊以始祖神元皇帝配

為壇通四陞為壇埵三重天位在其上南面神元西面五  
精帝在壇內壇壝內四帝各於其方一帝在末日月五  
星二十八宿天一太一北極司中司命司祿司民在中  
壝內各因其方其餘從食者各一千餘神餼在外壝內  
藉用藁秸玉用四珪幣用束帛牲用黝犢器用陶匏上  
帝神元用犢各一五方帝共用犢一日月等共用牛一  
祭畢燎牲體在于壇南已地從陽之義其瘞地壇兆制  
同南郊明年正月辛酉郊天癸亥瘞地於北郊以神元  
竇皇后配五嶽名山在中壝內四瀆大川於外壝內后  
土神元后牲共用玄牡一玉用兩珪幣用束帛五嶽等用  
牛一祭畢瘞牲體在于壇之北亥地從陰也其後冬至  
祭上帝于圜丘夏至祭地于方澤用牲幣之屬與二郊

同冬十月置大社大稷帝社于宗廟之右為方壇四陞祀以二月八月用戊皆太牢句龍配社周棄配稷皆有司侍祀立祖神嘗以正月上未設藉于端門內祭牲用羊豕犬各一宮中立星神一歲一祭嘗以十二月用馬薦各一牛豕各二雞一太祖初有兩彗星見劉后使占者占之曰祈之則當掃定天下后從之故立其祀又立神位十二歲一祭嘗以十一月各用牛一雞三又立王神四歲二祭嘗以八月十月各用羊一又置獻明以上所立天神四十所歲二祭亦以八月十月十月神尊者以馬次以牛小以羊皆女巫行事

三年正月癸亥有事於北郊

二月丁亥詔有司祀日於東郊用騂牛秋分祭月于西

郊用白羊一

天賜二年四月復祀天于西郊

為方壇一置木主七于上東為二陛無等周垣

四門門各依其方色為名牲白犢黃駒白羊各一祭之日帝御大駕百官及賓國諸部大人畢從至郊所帝立青門內近南壇西內朝臣皆位于帝壇北外朝臣及大人咸位于青門之外后率六宮從黑門入列于青門內近北西面廩犧令掌牲陳于壇前女巫執鼓立于陛之東西面選帝之十族子弟七人執酒在巫南西面北上女巫升壇搖鼓帝拜后肅拜百官內外盡拜祀訖復拜拜訖乃殺牲執酒七人西向以酒灑天神主復拜如

此者七禮畢而返自是之後歲一祭

明元永興三年三月帝禱于武周車輪二山

初清河王紹有寵于

道武性凶悍帝每以義責之弗從帝懼其變乃於山上祈福於天地神祇及即位壇兆後因以為常祀歲一祭

牲用牛皆帝親祀之無常月明年立道武廟于白登山  
歲一祭其牲太牢帝親祀之亦無常月兼祀皇天上帝  
以山神配旱則禱之多有效是歲又加置天地日月之  
神及諸小神二十八所於宮內歲二祭各用羊一又別  
置天神等二十三於道武廟左  
右其神大者以馬小者以羊

泰常三年為五精帝兆於四郊遠近依行數各為方壇  
四陞埽壇三重通四門以太皞等及諸佐隨配侑祭黃  
帝常以立秋前十八日餘四帝各以四立之日牲各用  
牛一有司主之又六宗靈星風伯雨師司民司祿先農  
之壇皆有別兆祭有常日牲用少牢立春之日遣有司

迎春于東郊祭用酒脯棗栗無牲幣又立五嶽四瀆廟  
于桑乾水陰春秋遣有司祭有特牲及幣四瀆唯以牲  
牢准古望秩云其餘山川及海若諸神在州郡者合三  
百二十四所每歲十月遣祀官詣州鎮遍祀有水旱災  
厲則牧守各隨其界內而祈謁其祭皆用牲王畿內諸  
山川皆列祀次祭若有水旱則禱之

四年八月辛未幸代至鴈門關望祀恒嶽

八年正月北巡恒嶽祀以太牢

四月幸雒陽遣使以太牢祀嵩高華嶽還登太行

五月至自雒陽諸所過山川羣神祀之

太武神麇二年四月以小駕祭天神禮畢帝遂親戎大捷而還歸格於祖禰遍告羣神

太延元年立廟于恒嶽華嶽嵩嶽上各置侍祀九十人

歲時祈禱其水旱春秋泮涸遣官率刺史祭以牲牢有

玉幣

魏之先居幽都也鑿石為祖宗之廟於烏維侯國西北自後南遷其地隔遠真君中烏維侯國遣使

朝獻云石廟如故民嘗祈請有神驗焉其歲遣中書侍郎李陝詣石堂告祭天地以皇祖先妣配祝曰天子諱

謹遣殿等用駿足一元大武敢昭告于皇天之靈自啟  
闢之初祐我皇祖于彼土田歷載億年聿來南遷惟祖  
惟父光宅中原克剪山醜拓定四邊冲人慕業德聲弗  
彰豈謂幽遐稽首來王具知舊廟弗毀弗亡攸攸之懷  
希仰餘光王業之興起自皇祖縣縣瓜瓞時惟多祜敢  
以丕功配享於天子子孫孫福祿永延厥等既祭斬樺  
木立之以置牲醴而還後所立樺木長成林其民益神  
奉之咸謂魏國感靈祇之應也石室南距代京可四千  
餘里明年六月司徒崔浩奏議神祀多不經案祀典  
所宜祀凡五十七所餘復重及小神請皆罷之奏可

### 十二月遣使者以太牢祀北嶽

太平真君十二年十一月帝南征過常山祀以太牢浮  
河濟祀以少牢過岱宗祀以太牢遂臨登瓜步而還

文成興光元年正月遣有司詣華嶽修廟立碑數十人  
在山上聞虛中若音聲聲中稱萬歲云

和平元年正月帝東巡幸遼西望祀醫無閭山遂緣西  
南幸冀州北至中山過恒嶽禮其神而返

二年二月帝南巡過石門遣使者用玉璧牲牢禮恒嶽  
四月旱下詔郡州於其界內神無大小悉灑掃薦以酒  
脯年登之後各隨本秩祭以牲牢至是羣祀先廢者皆  
復之

獻文皇興二年二月以青徐既平遣中書令兼太常高  
允奉玉幣祀於東嶽

孝文太和十年四月甲子帝初以法服御輦祀於西郊  
十二年閏九月甲子帝觀築園丘於南郊

十三年正月辛亥有事於園丘於是初備大駕五月庚  
戌有事於方澤

十五年八月議肆類上帝禋於六宗之禮帝親臨決  
十二月壬辰遷社於內城之西巳酉帝迎春于東郊

十六年二月甲午初朝日于東郊遂為常

三月乙亥帝初迎氣南郊自此為常

八月庚寅帝初夕月於西郊遂以為常

十八年二月乙丑行幸河陰規建方澤之所

十九年正月己亥南征濟淮命太常致祭己未行幸遐  
丘遣使以太牢祀岱嶽

十一月行幸委粟山議定園丘甲申有事于園丘

二十年五月丙戌立方澤於河陰丁亥有事于方澤

宣武景明二年十一月壬寅改築園丘於伊水之陽乙卯仍有事焉

孝明正光三年十一月乙巳有事於園丘

五年正月辛丑有事於南郊

出帝太昌元年十一月丁酉日南至有事於園丘

西魏文帝大統二年正月辛亥祀南郊改以神元皇帝配

四年正月辛酉拜天於清暉室終帝世遂為常



冊府元龜卷三十二下

欽定四庫全書

子部

冊府元龜卷三十三至五

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣鮑之鍾

謄錄監生臣蔡齊明

欽定四庫全書

冊府元龜卷三十三

宋 王欽若等 撰

帝王部

崇祭祀第二

後周閔帝元年

正月辛丑

即天王位柴燎告天壬寅祠

圜丘

詔曰予本自神農其於三丘宜作厥主始祖獻侯

啓土遼海肇有中國其配南北郊文考德符五運受天明

命祖於明堂以配上帝廟為太祖癸卯祠方丘甲辰祠

太社辛亥祠南郊二月癸酉朝日于東郊戊寅祠太社  
八月戊辰祠太社

明帝元年十月乙酉祠園丘丙辰祠方丘甲午祠太社  
十一月丁未祠園丘

武帝保定元年正月庚戌祠園丘壬子祠方丘甲寅祠  
感帝於南郊乙卯祠太社

二月甲午朝日於東郊

太和元年三月丙午祠南郊

二年三月初立郊丘壇壝制度

三年正月辛丑祠南郊

建德二年正月辛丑祠南郊

六年五月己丑祠方丘

宣帝宣政元年六月即位七月丙午祠圜丘戊申祠方丘

八月丙寅夕月于西郊

隋高祖開皇元年二月甲子即位設壇於南郊天使柴

燎告天丙寅詔修社廟

三年四月癸巳親雩

五月辛酉有事於方澤

八月戊子有事於大社

四年正月辛未有事於南郊

七年二月丁巳朝日於東郊

十年十一月辛丑有事於南郊

十二年十一月辛亥有事於南郊

十四年閏十月詔東鎮沂山南鎮會稽山北鎮醫無閭  
山冀州鎮霍山竝就山立祠東海於會稽縣界南海於  
南海鎮南竝近海立祠及四瀆吳山竝取側近巫一人  
主知灑掃竝命多時松柏其霍山雩祠日遣使就焉甲戌

年正月詔北鎮於冀州龍山立祠東鎮晉  
州霍山鎮若修造竝准西鎮吳山造神像

十五年正月東巡狩次齊州丙寅旅玉符山

三月己未至自東巡狩望祭五嶽海瀆

六月辛丑詔名山大川未祀者悉祭之

十八年十一月癸未有事於南郊

仁壽元年十一月己丑有事於南郊

煬帝大業元年孟春祀感帝孟冬祀神州改以高祖文帝配其餘竝用舊禮

四年八月辛酉親祀恒嶽河北道郡守畢集

十一年十一月乙巳有事於南郊

唐高祖武德元年五月甲子即位遣燕太尉禮部尚書

蕭造告於南郊

二年十月幸華陰甲子親祀華山

三年四月親祠華山

四年十一月甲子有事於南郊

七年六月幸仁智宮以少牢祭宮所山川

九年正月丙子詔曰厚地載物社主其祭嘉穀養民稷

惟元祀列聖垂範昔王通訓建邦正位莫此為先爰暨

都邑建于州里率土之濱咸極莊敬所以勸農務本修

始報功敦序教義整密風俗末代澆浮祀典虧替時逢

喪亂仁惠弛薄壇壝闕昭備之禮鄉閭無紀合之訓朕  
握圖受歷菲食卑宮奉珪璧以尊嚴潔粢盛而禋燎尚  
想躬稼厲精治本永言享祀宜存億紀是以吉日惟戊  
親祀大社率從百僚以祈九穀今既南畝倣載東作方  
興州縣致祀宜盡祗肅四方之民咸勤殖藝隨其性類  
命為宗社京邑庶士臺省羣官里閭相從共尊社法以  
時供祀各申祈報兼存宴醕之義用洽鄉黨之歡且立  
節文明為典制進退俯仰登降折旋明加誨厲遞相勸

獎齊之以禮有恥且格布告天下即宜遵用戊寅親祀  
稷

太宗以武德九年八月甲子即位遣兼太尉司空裴寂  
柴燎告天於南郊

貞觀五年十一月丙子帝有事於南郊

十四年十一月甲子朔旦冬至親祠南郊

十七年十月甲寅詔曰朕聞上靈之應疾於影響茂祉  
之興積於年代朕嗣膺寶歷君臨區宇憑宗社之介福

賴文武之同心時無風塵之警野有京城之積厚地降  
祉貞石表祥營翠色而流光發素質而成字前紀厥初  
之德次陳卜年之永後述儲貳之美竝名字昭然楷則  
相次曠代之所未聞故老之所未覩猥以寡德處奉成  
命緬惟徃載良增兢惕自天之佑豈惟一人無疆之福  
方覃九土自非大報泰壇稽首上帝則靡申奉天之志  
寧副臨下之心今年冬至有事南郊所司率繇舊典十  
一月己卯有事於南郊太宗升壇皇太子從奠於時累

日陰雪是旦猶雲霧晦冥及太宗升壇煙氛四散風景  
清朗文物昭映禮畢祝官讀謝天瑞文曰嗣天子臣諱  
敢昭告于昊天上帝諱纂承鴻基君臨宇縣夙興旰食  
無忘於政道導德齊禮良愧于前聖爰有成命表瑞貞  
石文字昭然歷數惟永旣旌高廟之業又錫眇身之祚  
逮于皇太子某亦降禎符竝具紀姓氏兼列名字仰瞻  
雲漢寔銘大造俯惟寡薄彌增寅懼敢因大禮重薦玉  
帛上謝明靈之貺以申祗慄之誠皇太子某亦恭至泰

壇虔拜於蒼昊庶憑眷祐之德永膺無疆之休

初十六年太宗

遣刻受命玄玉璽白玉為螭首其文云皇天景命有德者昌竝神筆隸書然後鐫勒是日侍中負之以從

十九年征遼三月丁丑幸定州經北嶽帝自為文祭之  
高宗永徽三年三月甲子詔升先蠶為中祀

乾封二年十二月甲午詔曰夫受命承天崇至敬於明祀膺圖纂錄昭大教於嚴配是以薦鮪鱮於清廟集振鷺於西雍宣雅頌於太師明肅恭於祖考用能紀配天之盛業嗣積德之鴻基永播英聲長為稱首自周京道

喪秦室政乖禮樂淪亡典經殘滅遂使漢朝博士空說  
六宗之文晋代鴻儒爭陳七祀之議或同昊天于五帝  
或分感帝于五行自此以降遙相祖述異論紛紛是非  
莫定朕以寡薄嗣膺丕緒肅承禋祀明發載懷虔奉宗  
祧寤寐興感每惟宗廟之重尊配之儀思革舊章以申  
誠敬禮曰化人之道莫急於禮禮有五經莫重於祭祭  
者非物自外至也自内生於心也是以惟賢者乃能盡  
祭之義况祖功宗德道冠百王盡聖窮神義高千古自

今已後祭園丘方丘明堂感帝神州等祖高祖太武皇帝太宗文皇帝崇配仍總祭昊天上帝及五天帝於明堂庶因心致敬獲展虔誠宗祀配天永光鴻烈

上元三年二月詔以今冬有事於嵩嶽命所司修撰儀注務從典故閏三月詔以吐蕃犯塞停嵩嶽封禪之禮永淳二年春正月甲午朔車駕發東都庚子至奉天宮遣使祭嵩嶽及少室箕山具茨等山西王母啓母廟中宗神龍元年五月改先農為帝社壇西帝稷壇禮同大

社大稷壇不備方色所以異於大社也

九月壬午親祀昊天上帝皇地祇于明堂高祖天皇大帝配

景龍三年十一月乙丑親祀南郊

十二月甲午幸新豐溫湯境內有自古帝王陵致祭

睿宗太極元年正月辛巳有事於南郊

五月戊寅有事於北郊

玄宗先天二年八月癸丑封華嶽神為金天王

開元四年二月甲子命有司以少牢致祭驪山仍禁樵採時大旱應禱而雨報之也

五年正月命右散騎常侍褚無量攝黃門監致祭于帝堯祠吏部尚書兼黃門監宋璟致祭于帝舜祠紫微侍郎同紫微黃門平章事蘇頲致祭于夏禹祠各令當州刺史上佐為亞獻終獻

十二月戊寅詔曰國之大事在祀神之所歆惟敬潔誠而齊精意以享則可臻介福致休祥深慮有司未副厥

旨所緣宗廟社稷嶽瀆等祭宜令禮官博士斟酌古今  
務加虔肅合於典禮即詳定奏聞

八年三月勅頃歲未登水旱不節今春事方起農桑是  
憂祈於上玄福茲下土式展郊禋之禮以申誠請之心  
宜令左常侍元行冲攝侍中祠南郊太常長官分祭華  
嶽溫湯

十年十二月壬寅將北巡詔曰王者承事天地以為主  
郊享泰尊以通神蓋燔柴太壇定天位也瘞埋太折就

陰位也將以昭報靈祇克崇嚴配爰迨秦漢稽諸祀典  
立甘泉於雍時祠后土於汾陰遺廟巋然靈光可燭朕  
觀風唐晉秩望山川肅恭明神思致裡敬為人求福以  
輔升平今此神符應於嘉德宜以來年正月北巡狩行

幸至汾陰以二月祠后土所司准式

先是雕上有后土祠嘗為婦人塑像

則天時移河西梁山神塑像就祠中配焉至是有司送梁山神像於祠外之別室內出錦繡衣服以上后土之神乃更加裝飾焉又於祠堂院外設壇如皇地祇之制及所司起作獲寶鼎三枚以獻

十一年正月行幸北都二月壬子祠后土於汾陰之雕

上

四月庚申勅曰河東冀方其鎮惟霍神為天吏山有嶽  
靈在昔皇業初興肇蒙嘉祉今者省方旋軫重獲休徵  
同受三神之貺獨忘百邑之禮其霍山宜崇飭祠廟秩  
視諸侯蠲山下十戶以為灑掃晉州刺史春秋致祠

九月癸未制曰帝王承天必崇告類之典文武尊祖是  
遵嚴訓之義所以克荷成命昭升前烈蓋王者之子道  
乃聖人之神教朕以寡昧猥承丕緒獲主祭祀一紀于

茲輔相之宜下不足以被物馨香之德上不足以動天  
故歲咸不登刑且未恤內省為媿大禮猶鬱星晷驟遷  
夙夜祇懼今四夷內附諸侯率職羣生和洽百物阜蕃  
猶恐教或未孚求之皇極誠有不達觀於國風故親巡  
河東祈穀雊上神歆有答歲物以冀此皆先聖無疆之  
休上玄啟祐之貺冀因報謁式展誠敬宜以迎日之至  
允備郊天之禮所司詳擇舊典以聞十一月戊寅親祠

南郊

十二年十一月庚午幸東都勅有司所經名山大川自古帝王陵忠臣烈士墓精意致祭以酒脯時菓用代牲牢丙寅至華陰上制岳廟文命刺史徐知仁與信安王禕勒石於華嶽祠南之通衢

十三年十一月壬辰詔封太山神為齊天王禮秩加三公一等宜令所管崇飾祠廟近山十里禁樵採

十六年六月丁亥詔曰爰自首春有愆時雨朕憂勤黎獻精禱靈祇遂蒙九玄垂福百神效祉膏澤頻降嘉生

繁育睦彼山川能興雲雨報功享德祀典存焉諸州所  
管名山大川宜令當處長官設祭務盡誠敬以昭典禮  
庚寅詔曰宗社垂祐陰陽順成甘澤應時庶物繁育祇  
奉靈慶寅畏載深宜令中書門下肅事昭報仍令所司  
擇日奏聞

十八年正月丁巳親迎氣於東郊禮畢詔其海內五嶽  
四瀆及諸鎮名山大川及靈跡各令郡縣逐處設祭  
八月丁酉詔曰祭主於敬神歆惟德黍稷非馨蘋藻可

薦宣尼闡訓以仁愛為先句龍業官以生植為本普天  
率土崇德報功饗祀惟殷封割滋廣非所以全惠養之  
道叶靈祇之心其春秋二祀及釋奠天下諸州府縣等  
竝停牲牢唯用酒脯務在修潔足展誠敬自今已後以  
為常式

十九年四月壬辰兩京及天下諸州各置太公廟一所  
制曰乾坤冲用陰陽所以運行帝王大業文武所以垂  
範故四序在乎平分五材資於竝用式稽乾坤之意載

明文武之道永言舊章斯典未洽自我而始爰脩闕文  
昔義皇立弧矢之象黃帝有甲兵之事將以定禍亂濟  
生靈分二柄而齊設配兩儀而共久至若用之以仁義  
行之以禮樂龍豹卷舒而莫測星辰應變而無方誰其  
尸之則齊太公之道也故宣尼大聖立文以化成尚父  
惟師仗武而弘訓齊魯之道列親賢之教興鬱為政源  
崇我王業遂使金石之奏永播於蹲龍之庭烝嘗之享  
不行於非熊之室文武竝設斯不然矣豈王風云季禮

沒於前修將帥是尊慶彰於今日式崇大典垂裕後昆  
宜令兩京及天下諸州各置太公尚父廟一所以張良  
配享春秋二時取仲月上戊日祭諸州賓貢武舉人准  
明經進士行鄉飲酒禮每出師命將辭訖發日便就廟  
引辭仍簡取自古為將功業顯著康濟生人者十人准  
十哲例預享

甲辰命有司祭五嶽四瀆以尚書省諸曹郎分往諸州  
祭焉

二十年四月戊申命有司擇日就祭五嶽四瀆

十一月庚午祀后土於雒上命有司陳禮帝質明而享是日大赦制五嶽四瀆名山大川各令致祭務盡誠潔二十二年四月詔曰春秋祈報郡縣常禮比不用牲豈云血祭陰祀貴臭神何以歆自今已後州縣祭社特牢宜依常式

六月詔曰春來多雨歲事有妨朕自誠祈靈祇降福以時開霽迄用登成永惟休徵敢忘昭報宜令所司擇日

享九廟仍令高品官祭五嶽四瀆其天下名山大川各令所在長官致祭務盡誠潔用申精意

二十三年正月乙亥藉田祀先農禮畢詔五嶽四瀆名山大川竝令所在長官以禮致祭已卯勅曰自今已後有大祭宜令丞相特進少保少傅尚書賓客御史大夫攝行事

二十四年七月庚子有上封事者言月令云八月日月會于壽星居列宿之長五者土之數以生為大臣竊以

壽者聖人之長也土者皇家之德也陛下首出壽星之次旅于土德之數示五運開元之期萬壽無疆之應伏請兩京各改一殿以萬壽為名至千秋節會百僚於此殿如受元之禮每至八月社日配壽星祠至於大社壇享之詔曰德莫大於生成福莫先於壽考苟有所主得無祀之今有上事者言仲秋日月會於壽星以為朕生於是月欲以配社而祭於義不倫且壽星角亢也既為列宿之長復有福壽之名豈惟朕躬獨享其應天下萬

姓寧不是懷蓋秦時已有壽星祠亦云舊矣宜令所司特置壽星壇常以千秋節日修其祀典申勅壽星壇宜祭老人星及角亢七宿著之常式

二十五年十月戊申勅曰時和年豐神所福也精意備物祭之義也朕每為蒼生嘗祈稔歲微誠有感不應乃彰今宗社降靈神祇効祉三時不害百穀用成遂使京坻遍于天下和平之氣既無遠而不通禋祀之典亦有期而必報宜令兵部尚書燕中書令晉國公李林甫工

部尚書同中書門下三品龜國公牛仙客即分祭郊廟  
社稷尚書左丞相裴耀卿祭中嶽禮部尚書杜暹祭東  
嶽御史大夫李適之祭西嶽太子賓客王丘祭北嶽國  
子祭酒張說祭南嶽其四瀆四海四鎮及諸名山靈跡  
等各委所繇州長官祭仍令所司即擇日聞奏務修蠲  
潔之禮以致精明之德冀申誠懇如朕意焉

二十六年正月丁丑親迎氣於東郊祀青帝

天寶元年正月丁未改元制曰前王重典在乎祭祀况

屬惟新事宜昭告五嶽四瀆名山大川諸靈跡及自古  
帝王忠臣義士竝令所繇州縣致祭

是月甲寅得靈符于尹喜臺西百官請崇徽號壬申詔  
曰神仙所緘造化同固爰初有待經韞櫝而多時潛應  
改元若符契之相合景福修介祇畏良深而羣官宗室  
抗疏於外元良諸子屢請於中逮夫緇黃蕪彼耆老以  
至懇誠不已前後相仍願加天寶之名用益開元之號  
顧惟菲薄曷以當之然則玄貺在乎欽承人心難以固

拒順天從衆義叶至公敬依所請實用多愧斯蓋上玄  
厚載爰自百神孚佑效靈通於睿祖幽贊惟新之歷克  
彰永代之祥宜遵祀典式陳昭報可以來月十五日祔  
玄元皇帝廟十八日享太廟二十日有事於南郊宜令  
中書門下與禮官等即詳定禮儀具錄聞奏應緣行事  
及檢校官等各委有司不須別差人執當其北郊宜差  
公卿擇日祭五嶽四瀆及名山大川各令所在長官備  
禮陳祭務申誠敬副朕意焉

二月丙戌詔曰凡所祭享必在躬親朕不親祭禮將有闕其皇地祇宜就南郊乾坤合祭

三月丙申合祭天地於南郊

十月戊寅詔曰社為九土之尊稷乃五穀之長春祈秋報祀典是尊而天下郡邑所置社稷等如聞祭事或不備禮苟崇敬有虧豈靈祇所降欲望和氣豐年焉可致也朕永惟典故務在潔誠俾官吏盡心庶蒼生蒙福自今已後應祭官等庶事宜倍加精潔以副朕意其社壇

側近仍禁樵牧至如百姓私社宜與官社同日致祭

十二月乙亥詔曰歲之豐儉雖繫於常數天之感應實在於精誠頃者按以陰陽求諸推步至於今歲不合有年朕所以齋心妙門懇其玄德靈徵不遠丕應乃彰果獲西成頗為善熟蓋至道儲祉惠於蒸人亦羣神叶贊錫以昭報詩不云乎無德不報宜令光祿卿嗣鄭王希言祭東嶽太子詹事嗣許王瓘祭中嶽太常卿韋紹祭北嶽所司即擇日錄奏其四瀆及諸名山大川或遠近

不同各委所繇郡長官便擇吉日致祭務崇豐潔以稱朕懷

三載三月戊寅并社稷五星為大祀詔曰祭之為典以陳至敬名或不正是相奪倫況社稷享祐百代蒙其福日月炤臨五星叶其紀兆庶允殖下土式瞻既超言象之外須極尊嚴之禮列為中祀頗紊大猷自今已後社稷及日月五星竝升為大祀仍以四時致祭諸星升為中祀庶昭報之誠格于上下欽崇之稱合于典則

四月丙辰遣使分祀嶽瀆詔曰務農勸穡雖用天道人和歲稔實賴休徵頃者春夏之交稍愆時雨收穫之際復屬秋霖慮害農功每祈孚佑遂得百神降福羣望效靈既不為災仍多善熟幽贊之德普洽於生人昭報之儀式遵於祀典宜令太子詹事嗣許王瓘祭東嶽光祿卿嗣鄭王希言祭中嶽宗正卿濮陽郡王徹祭西嶽少府監李知柔祭南嶽衛尉卿嗣吳王祗祭淮瀆光祿少卿彭果祭河瀆所司擇日錄奏其名山大川有路近處

亦合便祭僻遠處委所繇長官備禮致祭務陳蠲潔以達精誠

十一月癸亥勅曰王者父事天母事地所以昭孝敬之道通神祇之德朕虔奉明命備稽大猷實在緣情不惟相襲伏以昊天上帝義在尊嚴恭惟祀典每用冬至既於是日有事於園丘更受朝賀實深兢惕自今已後冬至宜取以次日受朝仍永為常式壬申勅曰敬惟明神普存於祀典咸秩羣望式重於邦畿頃者分命使臣致

誠嶽瀆山川便近亦已有處分其關輔之內屢有陳祈王者所都禮亦異數應關內名山大川各委所繇郡長官稍優於常禮致祭於京兆府界宜委蕭焰同與少尹分祭倍崇精潔以副誠祈

十二月癸巳制曰惟神之主必恭禋祀率先之訓義在躬親朕欽若昊穹子育黎庶思通明靈之德以洽和平之理是修闕典咸秩無文如在之誠久陳於郊廟懷柔之至亦徧於山川況九宮所主百神之貴上分天極下

統坤維陰騭生靈功深亭育故式昭新典肇建明祠將  
以為人載祈孚佑宜叶元辰之吉用申大祭之禮可以

今月立春朕親祀九宮壇仍令中書門下與禮官等即

詳定儀注奏聞癸丑親祠九宮貴神於東郊

時有術士  
蘇嘉慶上

言請於京城東朝日壇東置九宮貴神壇三成成三尺  
四階其上依位置九壇壇尺五寸東南曰招搖正東曰  
軒轅東北曰太陰正南曰天一中央曰天符正北曰太  
一西南曰攝提正西曰咸池西北曰青龍五為中戴九  
履一左三右七二四為上六八為下符於遁甲四孟月  
祭尊為九宮貴神禮次昊天上帝而在太清宮太廟之  
上用牲牢璧幣類於天地神祇帝  
親祀之如有司行事即宰相為之

四載勅風伯雨師竝依升入中祀乃令諸郡各置一壇  
因春秋祭社之日同申享祀至九月勅諸郡風伯壇置  
在社壇之東雨師壇之西各稍北三十步其壇卑小於  
社壇其祭官准祭社例取太守以下充

五載正月乙亥詔曰五方定位嶽鎮總其靈萬物阜成  
雲雨施其潤上帝攸叙寰區是仰且岱宗西華先已封  
崇其中嶽等三方典禮所尊未齊名秩永言光被用叶  
靈心其中嶽神宜封為中天王南嶽神為司天王北嶽

神為安天王應湏告祭仍令所司擇日聞奏

四月乙亥詔曰皇天之典聿循於百代郊祭之儀允屬於三靈聖人既因時以制宜王者亦緣情以革禮朕丕承寶運肅遵明禋曷嘗不克已齋心虔恭夙夜猶慮舊章或闕誠敬未孚有一於此良深祇畏且尊莫大於天地祭莫大於祖宗嚴配昭升豈宜異類今烝嘗之獻既著於常式南北之郊未展於時享粢盛且略對越何申自今已後每在四時孟月先擇吉日祭上帝其以皇地

祇合祭以次日祭九宮壇皆令宰臣行禮奠祭務從蠲  
潔稱朕意焉祭神如在傳諸古訓以多為貴著自禮經  
脾膋之儀蓋昔賢之尚質甘旨之品亦孝子之盡誠既  
切因心方資變禮其已後享太廟宜料外每室加嘗食  
一牙盤仍令所司務盡豐潔發生振蟄雷為其始畫卦  
陳象威物效靈氣實本於陰陽功乃施於動植今雨師  
風伯久列常祠唯此震雷未登羣望其已後每祀雨師  
宜以雷神同祭朕承宗廟之福為人神之主事有未暢

義在得中庶寅畏之誠上達於郊廟祈禳之典載收于闕遺凡在有司各揚所職倍宜恭肅以叶靈心

十二月辛酉詔曰孝享宗廟所以達思誠也格於神祇所以崇嚴敬也則祈穀上帝春祀先王永惟因心敢忘如在朕承累聖之丕業應上玄之福佑聿脩柴瘞虔奉烝嘗常慮備物未豐馨香莫達頃已詳諸舊典創以新儀清廟陳牲特加於常餼昊天冬祭重增以時享庶乎罄齊敬之勤叶殷薦之義况履茲霜露載感惟深瞻彼

郊壇有懷昭事念禮歸通變諒期乎達誠教在率先必  
貴乎親奠宜以來載正月朕親謁太廟便於南郊合祭  
仍令中書門下即與禮官詳定儀注擇日奏聞興言拜  
獻先深祇感凡百有司各供爾職

六載正月戊子親祀南郊遂祀皇地祇詔曰四瀆五嶽  
雖差秩序興雲播潤盖同利物崇號所及錫命宜均其  
五嶽既已封王四瀆當升公位遞從加等以答靈心其  
河瀆宜封靈源公濟瀆封清源公江瀆封廣源公淮瀆

封長源公仍令所司擇日差使告祭并五嶽及名山大川竝令所在長官致祭又諸州武舉人上省先謁太公廟拜將帥及行師尅捷亦宜告獻

七載五月壬午帝加尊號詔五嶽四瀆名山大川各令本郡長官致祭

八載六月詔曰九州之鎮實著禮經三代之典必崇望秩事既屬於報功義有符於錫命其九州鎮山除入諸嶽外宜竝封公仍各置祠守者量更增修儲慶發祥當

申昭報宜令所在長官各陳祭禮名山大川亦量事致祭

九月命宗正卿褒郡信王璆祭西嶽太僕少卿蕪單于安北副大都護張齊丘祭北海蜀郡長史鮮于仲通祭江瀆太子詹事李旭祭北嶽尚書右丞李通遷祭河瀆詔曰朕肅恭明祀祈福上玄冀敷佑於黎蒸將昭報於靈應頃蠻夷款附萬里廓清稼穡豐穰羣方樂業豈惟菲德以致元和實賴神休永綏景貺思崇望秩用展虔

誠宜令宗正卿褒信郡王璆等即分往五嶽四瀆及四海致祭所經道次者名山大川亦便致祭務令精意以稱朕懷

九載四月詔曰五材竝用時表上靈八水分流實稱善利京師輿壤秦甸王畿灞澹通於涇渭滂澍滙於澧瀆蓄洩雷雨滋育稼穡雖惠澤已及於蒸民而虔誠猶闕於祀典聿崇精享庶達明神其涇渭灞澹等分水宜令禮儀使左庶子韋述取今月二十九日一時備禮致祭

卷三十三  
務陳蠲潔稱朕意焉

十載正月甲子有事於南郊合祭天地大赦天下制曰  
禮者所以訓導人俗昭事明祇有因增修以會其本況  
國之大典在於精裡必資備禮以章遵奉自今已後攝  
祭南郊薦獻太清宮薦享太廟其太尉行事前一日於  
致齋所具羽儀鹵簿公服引入朕親受祝板乃赴清齋  
以展誠敬夫子孝奉親極敬惟愛歿有思戚霜露之感  
逾深祭以吉蠲烝嘗之敬如在且廟者貌也取象存焉

是禮繇於情因心則感太廟宜置內官以備嚴奉仍於  
廟外造一院安置庶申罔極之思無忘事生之禮嶽瀆  
山川蘊靈毓粹雲雨之澤利及生人春秋之義存乎祀  
典況正其運序式遵咸秩其五嶽四瀆及諸鎮山宜令  
專使分徃致祭其名山大川及諸靈跡先有祠廟者各  
令郡長官逐便致祭

是月丁未封東海為廣德王南海為廣利王西海為廣  
潤王北海為廣澤王

二月己亥分遣嗣吳王祗祭東嶽齊天王嗣魯王宇祭南嶽司天王秘書監崔秀祭中嶽中天王國子祭酒班景倩祭西嶽金天王宗正少卿李成裕祭北嶽安天王衛尉少卿李濟祭江瀆廣源公京兆少尹章恒祭河瀆靈源公太子左諭德柳僊祭淮瀆長源公河南少尹豆盧回祭濟瀆清源公嗣道王鍊祭沂山東安公江東道採訪使吳郡太守趙居貞祭會稽山永興公大理少卿李禎祭吳嶽山成德公潁王府長史甘守默祭霍山應

靈公范陽郡司馬畢炕祭醫無閭山廣寧公竝取三月十七日庚子一時致祭申命太子中允李隨祭東海儀王府長史張九章祭南海太子中允柳奕祭西海太子洗馬李齊榮祭北海加王位且行冊禮也

四月辛巳制曰王者臨馭萬國莫不尊奉五嶽至於迎氣致祭必在辨方正位朕丕承眷命肅事嚴禮庶有合於乾坤用永垂於典實加以厚德載物莫先於土推誠導氣必叶於時在歷數之有徵諒國家之所感含弘廣

大利用豐功隨王雖布於四方歸本且關於中位朕式  
明統緒用答元符爰創新儀再修墜典頃者每祝黃帝  
乃就南郊義實有乖禮亦非便稽諸體式理固不然宜  
於皇城內西南就坤地改置黃帝壇朕當親祠以昭誠  
敬仍令中書門下與禮官更審叅詳奏聞

十一月壬午詔曰禮神以玉者蓋取其精潔表心溫潤  
合德為器有象正辭孚尹以達馨香其在珪璧頃來禮  
神六器及宗廟奠玉自馮紹正奏後有司竝用珉禮所

謂君子貴玉而賤珉不可用也朕精裡郊壇嚴敬宗廟  
奉惟新之祚庇太平之人則人力普存備物以享安可  
以珉代玉惜費事神況國家之祈福有萬方之助祭闕  
典必修無文咸秩豈於天地宗廟奠玉有虧自今已後  
乾坤六器宗廟奠玉竝用真玉諸祀用珉如以玉難得  
大者寧小其制度以取其真

十二載二月制五嶽四瀆及名山大川并靈迹之處各  
委郡縣長官致祭其祠宇頽毀者量事修葺

十四載八月辛卯制曰書云咸秩羣望詩曰懷柔百神  
永惟明徵豈忘昭報今秋稼穡頗勝常年實賴靈祇福  
臻稔歲其五嶽四瀆所在山川及得道昇仙靈跡之處  
宜委郡縣長官至秋後各令醮祭務崇嚴潔式展誠享  
是月癸未詔曰朕永念蒸人祈穀上帝而陰陽式序風  
雨不愆今獲稼穡阜成允賴神明幽贊也頃者虔心精  
享已申昭告其五嶽四瀆及天下諸郡山川近令秋後  
展祭收穫既就農畝事隙報功咸秩抑惟其時宜令所

在郡縣長官即擇良辰以崇明祀

冊府元龜卷三十三